



UJEDINJENE NACIJE

Međunarodni rezidualni mehanizam za krivične sudove

Međunarodni rezidualni mehanizam za krivične sudove (Mehanizam) osnovao je Savjet bezbjednosti Ujedinjenih nacija 22. decembra 2010. da nastavi nadležnosti, prava, obaveze i ključne funkcije Međunarodnog krivičnog suda za Ruandu (MKSJR) i Međunarodnog krivičnog suda za bivšu Jugoslaviju (MKSJ) nakon okončanja njihovih mandata 2015., odnosno 2017. godine.

IZJAVA

PREDSJEDNICA

(Isključivo za medije. Nije zvaničan dokument)

Hag, 11. juli 2022.

sudija Graciella Gatti Santana, predsjednica
Međunarodni rezidualni mehanizam za krivične sudove
Govor povodom komemoracije 27. godišnjice genocida u Srebrenici
11. juli 2022.

Dame i gospodo,

Dobar dan.

Čast mi je biti ovdje danas. Zaista, mnogo mi znači, kao novoj predsjednici Međunarodnog rezidualnog mehanizma za krivične sudove, što mogu biti s vama u Potočarima i obilježiti komemoraciju 27. godišnjice genocida u Srebrenici, tako kratko nakon početka mog mandata, prije deset dana.

Juče sam imala čast da učestvujem na konferenciji "Heroine Srebrenice", na kojoj su bile okupljene ne samo žene koje su preživjele genocid, već i cijeli niz učesnika koji rade zajedno da, iz perspektive žena, sačuvaju istinu o genocidu. A čuvanje istine je zapravo bit našeg boravka ovdje danas.

U očekivanju ove komemoracije, dugo sam razmišljala o događajima koji su se odvijali u Srebrenici i okolini u julu 1995. Pri tom sam shvatila da, koji god jezik govorimo, odakle god dolazimo, ime "Srebrenica" nosi takvu težinu i toliki značaj da ga znaju ljudi širom svijeta. Ono budi cijeli raspon sjećanja i emocija koje čovjeka mogu podići iz najvećih dubina očaja, sve do istinskog vjerovanja u ljudski duh i nadu u budućnost. Srebrenica s jedne strane znači okrutnost, zvjerstvo, nehumanost, zatim gubitak, bol i neopisivu tugu. Ali s druge strane, ona znači ogromnu hrabrost, otpornost, upornost i mogućnost pomirenja. Srebrenica nadilazi sva doba, religije i kulture.

Kao sudija Žalbenog vijeća Mehanizma u predmetu Radovan Karadžić, poblizje sam se upoznala sa zaključcima Pretresnog vijeća u vezi s dijelom predmeta koji se odnosi na Srebrenicu. Razumijevanje onoga što se desilo upravo ovdje, u obližnjim zgradama i na okolnom području čini moj boravak ovdje još tužnijim. Nadasve, ja lično, kao majka i supruga, mogu samo zamisliti agoniju koji ste vi, žrtve, proživjele. Ovu priliku koristim da izrazim iskrenu solidarnost sa svima onima koji su izgubili svoje voljene tokom grozota koje su se desile.

Uprkos nepobitnim presudama Međunarodnog krivičnog suda za bivšu Jugoslaviju, Mehanizma, Međunarodnog suda pravde i Suda Bosne i Hercegovine, koje su van svake sumnje dokazale da je u Srebrenici počinjen genocid, i dalje se suočavamo s onima koji pobijaju zaključke tih sudova, koji poriču vaše patnje. Međutim, mi znamo istinu. Zalažemo se za istinu i možemo naći utjehu u tim presudama,



koje govore same za sebe. Ali moramo se podsjetiti da su oni koji koriste takvu retoriku u manjini. Mada su oni glasni, ime Srebrenica odjekuje mnogo dalje.

Kao nova predsjednica Mehanizma, ponosna sam što preuzimam kormilo ove institucije koja, u kontekstu bivše Jugoslavije, postoji ne samo da se bavi rezidualnim funkcijama MKSJ-a, već i da čuva njegovo dragocjeno naslijeđe. To uključuje brojne zaključke više vijeća Međunarodnog suda u vezi s počinjenim zločinima i odgovornošću onih koji su za te zločine osuđeni. Naslijeđe MKSJ-a se stoga odražava na vaše živote i iskustva koja ste pretrpjeli. Dok se još više nestalih konačno polaže u grobnice, znajte da su vaše priče zabilježene za potomstvo i služe kao dokaz vaše hrabrosti da se suočite s onim što se vama, vašim porodicama, prijateljima i čovječanstvu u cjelini desilo ovdje u Srebrenici.

Generacijama koje su nam prethodile i onima koje će nas naslijediti dugujemo čuvanje istine. Međutim, naša odgovornost je takođe da pružimo ruku jedni drugima i da podijelimo svoje znanje o onome što se desilo za vrijeme sukoba. Uostalom, ako zaboravimo prošlost, osuđeni smo na to da je ponovimo.

Na kraju, dozvolite mi da vam pružim uvjerenja u to koliko sam posvećena tome da osiguram da Mehanizam nastavi štititi, čuvati i poticati naslijeđe MKSJ-a i na taj način osiguram da se glasovi žrtava uvijek čuju i da se istina nikad ne potisne.

Iskreno vam zahvaljujem na pažnji danas.

Hvala Vam.

Za više informacija stupite u kontakt sa Službom za odnose s javnošću

u Arushi, Tel.: +255 (0)27 256 5376

u Haagu, Tel.: +31 (0)70 512 5691

Email: mict-press@un.org

Pratite nas na [Facebooku](#), [Twitteru](#), [YouTubeu](#), [LinkedInu](#)

www.irmct.org